

ولاد ال (نثر)

عارف

ولاد النثر

اللى قاعدين يسمعوك دول

ويقولوا عليك

شاعر فاشل

- فى سرهم طبعا -

كل واحد منهم

أجهل من التانى

فرحانين بحبة مصطلحات

إيشى تفجير اللغة

وإيشى

(الكآبه) عبر النوعيه

وواحد فرحان بكلمتين إنجليزى

بيقولهم كل ما يتكلم

وفلان قال

وفلان عاد

تشكيله غريبه من المعاتيه

ولو قلت لواحد فيهم

إقرا لنا حاجه

من البتاع اللى كاتبه

أى حاجه

بتقول عليها قصيده

تحس إنه أعمى الودان

وفرضاً لو حب يقول ٠٠

يديها لوحد تانى يقرهاله

لأنه متخاصم

مع سيبويه . . .

وبيتحجج بأن عينيه

مش شايفه

ذى المطرب الفاشل

اللى يقول لك

عندى برد !

٢٠٠٥/١١/١١